



**TERTIB ACARA KEBAKTIAN MINGGU  
GKPS P.BULAN-RESORT POLONIA MEDAN  
Minggu SEXAGESIMA, 07 Februari 2021**



**TOPIK: "NAIBATA DO HAGOGHANTA"**

Live streaming: [www.gkpspadangbulan.com/tv](http://www.gkpspadangbulan.com/tv)

Tata Ibadah: <http://www.gkpspadangbulan.com/tatib>

**1. Votum – Introitus – Tonggo**

**P.** Riap ma hita jongjong!

Riap ma hita jongjong!

Ibagas Goranni Naibata Bapa, pakon Tuhan Jesus Kristus ampa Tonduy Na Pansing, sitompa langit pakon tanoh on. Amen.

Masuk ma hita, manrogop ma anjaha marsombah; manrogop ma hita i lobeini Jahowa, sitompa hita. Ai la do Naibatanta, anjaha hita bangsa pinarmahan-Ni, biri- biri tinogu- togu ni tangan-Ni, sadari on ma namin itangihon hanima sora-Ni. Haleluya, Haleluya, Haleluya.

P+K. (mandodingkon) Haleluya, Haleluya, Haleluya.

**P.** Martonggo ma hita!

Ham Tuhan Naibata Bapanami, simada kuasa anjaha pargogoh na so tarimbang. Tarima kasih ma bamu halani domma italuhon Ham kuasa pakon horjani siolis marhitei panaronan ni Anak-Mu Jesus Kristus Tuhan nami. Pargogohi Ham ma hanami ase lambin ihargahon hanami bangga ni holong-Mu mangkopkop hanami. Iondoskon hanami ma pamujion nami hu Bamu bahen hasangapon ni goran-Mu anjaha malas ni uhur bannami. Amen. (*Hundul Kuria*).

**2. Mandoding 402. Puji ma Naibatanta (1-2)**

1. Puji ma Naibatanta bai ianan Na PansingNi in, Bai paratas hamuliaonNi in Haleluya, Haleluya Puji ma Naibata.

Pasangap ma goranNi halani pambahenanNi in, ampakon hagogohonNi in Haleluya, Haleluya pasangap Naibata

Pahata ma tarompit ge arbab pe, irandu pakon gondrang husapi pe Irik homa sarunei ge sordam pe, sonai ampakon ogung marolol bei

Puji ma rumbuk ma baen parhata ni parugas in Sombah ma marhiteihonni doding na lurlur ijin

2. Puji ma Naibatanta Sipargogoh na tarsulur in, Parsimada harajaon in Haleluya, Haleluya Puji ma Naibata  
Pasangap ma goranNi, ale ganup na marhosah in, Ningon rup ma mamuji ijin Haleluya, Haleluya Pasangap Naibata  
Pahata ma tarompit ge arbab pe, irandu pakon gondrang husapi pe Irik homa sarunei ge sordam pe, sonai ampakon ogung marolol bei  
Puji ma rumbuk ma baen parhata ni parugas in Sombah ma marhiteihonni doding na lurlur ijin

**3. Hasasapan ni Dousa**

**P.** Riap ma hita jongjong!

Martonggo ma hita, sopoutkon hita ma dousanta hubani Tuhan Naibata. Ham Tuhan Naibata Bapa nami pargogoh na so tarimbang sitompa langit pakon tanoh on. Na susi do Ham janah paridop ni uhur bangga. Lang namin talup hanami roh hu lobei-Mu, halani buei ni dousa nami. Ai gati do hanami lang martenger ni uhur hu Bamu, agepe domma i hatahon Ham bannami, ase pitah Ham hansa Naibata nami, ulang marnaibata na legan. Halani ai do ase roh hanami hu lobei-Mu, mansopotkon dousa pakon panlanggaron nami. Holong ma atei-Mu, sai marpangulaki ma uhur-Mu mangidah hanami, sasap Ham ma dousa nami anjaha patotap Ham ma haporsayaon ampa tengerni uhur nami hu Bamu. Roh hanami mangindo ibagas goran ni Anak-Mu Jesus Kristus, Tuhan janah sihopkop hanami. Amen.

Tangar anjaha haposayai hita ma Hata ni Naibata, bagah – bagah pasal hasasapan ni dousa.

Age pe gerger dousa nima songon bunga ni dapdap, lopak do bahenon-Ku ai songon salju, age pe gerger songon hiou hasumba, putih do bahenon-Ku songon kapas. Ibagas holong ni Naibata, domma isasap haganup dousanta. Halani ai, pataridahkon hita ma tanda–tanda ni pargoluhan na bayu. Hasangapon ma bani Naibata i babou.

K. Amen.

(*hundul kuria*)

#### 4. **Mandoding 252. Sonang i Lambung Jesus (1+3)**

1. Sonang i lambung Jesus sonang na roh hujin  
Ulang be ho mabiar, lao mangayaki in  
Sai idilohon Jesus: Irikkon ma lah Au.  
Tadingkon hagolapan, janah haposi Au  
Sonang i lambung Jesus sonang na roh hujin  
Ulang be ho mabiar, lao mangayaki in;

3. Jesus haholonganku, Jesus haposankin  
Sadokah au manggoluh ampa bai ajalhin  
Seng be huhabiari ganup pangagou in  
Jesus do manramoti au hinopkop-Ni in  
Jesus haholonganku, Jesus haposankin  
Sadokah au manggoluh ampa bai ajalhin

#### 5. **Hata haporsayaan**

P. Riap ma hita jongjong!

Saksihon hita ma haporsayaonta in, songon na sinaksihon ni haganup halak na porsaya bani sab tanoh on!

P+K. Ahu porsaya bani Naibata Bapa, Pargogoh na so tarimbang, na manompa langit pakon tanoh on. Ahu porsaya bani Jesus Kristus, Anak ni Naibata na sasada in, in do Tuhanta, na tinubuhkon ni si Maria sanggah nape haliaban, marhitei Tonduy Na Pansing. Na manaron na parngit, bani panorang ni si Pontius latu, iparsilangkon, matei anjaha itanom, turun hu nagori toruh. Mulak manggoluh humbani na matei bani ari patoluhon. Naik hu surga anjaha hundul i siamun ni Naibata Bapa, Pargogoh na so tarimbang in. Hunjai ma la mulak magira laho manguhumi halak na manggoluh pakon na dob matei.

Ahu porsaya bani Tonduy Na Pansing, bani kuria parsadaan ni namapansing in, bani hasasapan ni dousa, bani parpuhooon ni angkula, pakon bani hagoluhan na sadokah ni dokahni. Amen

#### 6. **Persembahan Pujian Gadin Purba- "Berharaplah"**

#### 7. **Tingting + Tonggo Pangapition**

#### 8. **Mandoding 13. Sai Jolom Ham Tanganku (1+3)**

1. Sai jolom Ham tangan ku, sai togu au  
Ronsi rotap hosahku, parorot au;

Na dong au ra mardalan, sahalak au  
Sai Ham ma ale Tuhan manogu au

3. Ai anggo hasunsahan, buei do in  
Sonai pe pangahapan, sonang do in  
Age golap huidah i tanoh on  
torang do marpangidah bai uhurhon.

#### 9. **Ambilan: Jesaya 40:27-31**

#### 10. **Manggalang:**

P. Paima i ondoskon hita galanganta, tangar hita ma lobei hata ni Naibata nagabe onjolan banta laho manggalang, aima na tarsurat bani: Psalmen 50:14 "Galangkon ma bangga ni uhur bani Naibata, anjaha galari ma bagah-bagah mu bani sitimbulan in".

**Sonari patumpu hita ma galanganta.**

#### 448. **Mantin Ni In do Hape**

1. Mantin ni in do hape, padan ni Tuhan Jesus  
Pamalas uhur tene, bai ganup na tinobus  
Dear tumang padan-Nin, na gabe sijoloman  
Patoguh uhur do in bai na marpangarapan  
Sai hagolukon ma in baen rudang hajengeson  
Ase sonang ham ijin gok Tonduy Hasintongan  
Hinalayak-Ni do in pasirsir haluahon  
Janah damei uhurmin jumpahan hagoluhan

2. Sai jalo Ham Tuhan in na gabe Siparmahan  
Baen hatengeran do in ronsi na ondos padan  
Seng habiaran be in pori aha na masa  
Ai seng ijin ujungnin, goluh ni na porsaya  
Sai hagolukon ma in baen rudang hajengeson  
Ase sonang ham ijin gok Tonduy Hasintongan  
Hinalayak-Ni do in pasirsir haluahon  
Janah damei uhurmin jumpahan hagoluhan

K. (Mandodingkon) Ai ham do simada harajaon pakon hagogohon ampa hasangapon sadokah ni dokah ni. Amen.

**11. Tonggo Galangan – Panutup :**

**P. Riap ma hita jongjong!**

Martonggo ma hita mangondoskon galanganta hubani Naiabata Ham Tuhan Naibata, Bapa nami, pardear layak janah na unjah hubannami. Tarimakasihma hatahonon nami hu Bamu, halani tongtong do ipasu–pasu Ham goluh nami. Domma ihasomani Ham hanami janah i pasu–pasu Ham horja nami das hubani sadari on. Sonari, i bagas malas ni uhur roh do hanami mangondoskon buah ni horja na dob pinapasu–pasu-Mu in gabe galangan hatarimakasihon pakon puji–pujian nami hu Bamu. On pe sai jalo Ham ma galangan nami on, bahen hasangapon ni goran-Mu i dunia on. Ibagas goran ni Anak-Mu, Jesus Kristus Tuhan nami, jalo Ham ma tonggo nami on. Amen, !

P+K. Bamu sadokah ni dokahni, au on o Jesus Tuhankin,  
Ham ma lah haganup ompungni, gogohku pakon artangkin,  
Ai iberehon Ham darohMu, manggalar utang ni dousangku.

P. Ham Tuhan Naibata Bapanami pardear layak anjaha parholong atei banggal. Domma i suruh Ham Anak-Mu na sasada in hu dunia on manadingkon hasangapon-Ni anjaha maningon marsitaronon mangkopkop hanami pardousa. Marulak–ulakan do tong uhur-Mu hubannami, janah lang ipaturut Ham sitaronon in ampei hubani hadirion nami. Ham Tuhan torangi Ham ma uhur nami mandalani goluh on, ase tongtong i dingat hanami borat ni si taronon na iporsan Anak-Mu Jesus Kristus, mambahen tubuh uhur nami laho manadingkon sagala horja hagolapan nalang i harosukon Ham. Holong ma Ham Tuhan, pargogohi Ham ma hanami ase ipongkuthon hanami mangkorjahon parentah-Mu sadokah galuh nami i tanoh on. Ibagas Kristus Jesus, jalo Ham ma tonggo nami on. Amen.

P. Ham Bapa nami na i nagori atas. Sai na papansing ma goran-Mu. Sai roh ma harajaon-Mu. Sai saud ma harosuhni uhur-Mu i nagori tongah on, songon na i nagori atas. Bere Ham ma bennami sadari on hagoluhan ari–ari. Sasap Ham ma dousanami songon panasap nami bani dousa ni hasoman na mardousa dompak hanami. Ulang hanami bobai Ham hu parlajouan. Paluah Ham ma hanami humbani pangagou!

**12. Paingkatkon (Pengutusan)**

Laho ma nasiam, janah, “hagigihon nasiam ma najahat, haholongi nasiam ma na madear, anjaha pajongjong nasiam ma uhur i horbangan“.

**13. Pasu – pasu**

P. Jalo ham ( hita ) ma pasu – pasu humbani Tuhan Naibatanta:  
Ipasu–pasu anjaha iparorot Tuhan Naibata ma ham (hita). Isondangkon Tuhan Naibata ma bohini hu bamu (hu banta) janah maidop ma uhur ni mangidah ham (hita). Idompakhon Tuhan Naibatama bohini hu bamu (hu banta) janah ipasorap ma damei-Ni bani tonduymu (tonduyta bei). Amen.  
K. Amen, Amen, Amen